


Il SuperDizionario de lenghe furlane al è super anche tes visitis: plui di 15.000 al mês

Gratis e intuitîf, si lu cjate su www.arlef.it

Al baste dome un click par cjatâ intun moment la peraule furlane corete o cognossi i riferiments storics dal propri cognon. Cemût? Midiant dal SuperDizionario de lenghe furlane. Di fat, cuntune interface uniche e semplice al permet di acedi ai contignûts e ai risultâts di trê risorsis digjitâls preziosis dedicadis al furlan: il Grant Dizionario Bilengâl Talian-Furlan; il Dizionario de Lenghe Furlane (Monolengâl) e il Dizionario dai Cognons. L'ultin, in particolâr, al è une vere enciclopedia dai cognons dal Friûl cun dentri nons, riferiments storics, sclariments etimologjics, studis gjeografics e altris informazions e curiositâts. Che al sedi un imprest "Super" preseât lu conferme anche la medie di 15.000 visitis al mês, e anche il timp di visite che al è in medie di 5 minûts. E al è "Super" anche par cetancj altris aspiets: parcè che al è stât pensât cun criteris che a facilitin la leture, la consultazion e l'ûs sul computer e sul smartphone; al è gratis, al è acessibil a ducj, students, insegnants, ricercjadôrs, tradutôrs, ma anche citadins comuns e apassionâts de lenghe. Il grup di esperts che al à lavorât al so disvilup al à rivât a rindi la navigazion intuitive e imediade anche se la plateforme e à di gjestî une cuantitât di dâts une vore impuartante. Si fevele di 70.000 vôs talianis e plui di 68.000 vôs furlanis tal Dizionario Bilengâl; 7.000 lemis, 37.000 acezions e 51.000 frasis ta chel Monolengâl, plui di 8.000 cognons cun sclariments etimologjics e storics tal Dizionario dai Cognons.

Il SuperDizionario de lenghe furlane al è un projet realizât de ARLeF - Agenzie regionâl pe lenghe furlane, in atuazion dal Plan gjenerâl di politiche linguistiche pal furlan de Regjon Autonome Friûl-Vignesie Julie.



Il SuperDizionario de lenghe furlane

Lis trê risorsis che a componin il SuperDizionario a son stadis otimizadis e programadis cun lengaċs che a permetin une manutenzion costante e la integrazion cun gnovis tecnologjiis. Il risultât al è un ecosisteme moderni che al contribuîs a valorizâ e slargjâ l'ûs dal furlan, cun chê di proietâlu tal futûr digjitâl.

Lenghe furlane: le fevelin 444.000 personis

Tal sît de ARLeF www.arlef.it, te sezion "Materiâi", e je a disposizion "Furlan Contât", la publicazion che e da dongje i risultâts de ricercje sociolinguistiche "Tire fûr la lenghe", realizade par capî e analizâ l'ûs de lenghe furlane e di chês altris lenghis feveladis in Friûl. La indagjin e je stade fate tal 2023 di IRES FVG in colaborazion cul FEF e un comitât scientific constituît di linguiscj des universitâts di Bolzan, Milan, Pavia, Trent e Vigo (Galizie). Il volum, che al è stât editât par cure di IRES FVG in colaborazion cu la Agenzie, al met a disposizion de comunitât scientifiche, des istituzions e dai citadins un quadri analitic detaiât dai risultâts de ricercje. La ricercje, sostignude de Regjon Autonome Friûl-VJ, e je stade realizade cul contribût de ARLeF inte suaze dal Plan gjenerâl di politiche linguistiche pe lenghe furlane 2021-2025.

Il studi si è fondât su passe 4.300 intervistis cjapadis su in 178 Comuns dal Friûl-VJ e dal Venit orientâl midiant di un cuistionari di uns cent domandis, par plui a rispueste sierade.

Intal volum a vegnin presentâts la metodologjie doprade dai ricercjadôrs e i risultâts de grande cuantitât di dâts analizâts, cul supuart di taulis cartografichis e tabelis, dividudis daûr dai cjapitui: Famee, Comunitât, Competencis, Media, Ideologjie e Identitât. Cun di plui, la publicazion e ufris un confront cu lis ricercjis sociolinguistichis passadis, une analisi sul stât de lenghe furlane e une serie di riflessions e di propuestis pes politicis linguisticis futuris.

La edizion di cjarte di "Furlan Contât" e vignarà donade in curt aes bibliotechis dal Friûl e ai esperts dal setôr.